

Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut 2017-imi upernaakkut ataatsimiinnerannut atatillugu ukiunut sisamanut misileraataasumik aqqississuussineq, nammineq inigisap aserfallatsaalineqarneranut imaluunniit nukimmik sipaarnerunissamut sanasunik suliaqartitsinermut atatillugu aningaasartuutit katillugit 20.000,00 kr inummut ataatsimut akileraarutitigut ilanngaatigineqarsinnaalernissaanik suliaqassasut. Ukiut misileraataaffiusut tamarmik ukiumut 3.000.000 kr-nik aningaasanut inatsisitimmi illikartitsiviusaaq. Ukiut sisamat misileraataaffiusut ingerlareerpata misileraaneq nalilersuiffigineqassaaq.
(Inatsisartunut ilaasortaq Steen Lyngé, Atassut)

Akissuteqaat

(Aningaasaqarnermut Aatsitassanullu Naalakkersuisoq)

1. Siullermeerneqarnera

Naalakkersuisut sinnerlugit Inatsisartunut ilaasortaq Steen Lyngé aalajangiiffigisassatut siunnersuutaanut qutsavigaara.

Danskit naalakkersuisuisa nikerartut uani siunnersuutigineqartutut aqqissuussineq atuutsilersittarlugulu atorunnaarsittarsimavaat. Massakkut danskit naalakkersuisoriligaasa naalakkersuisunngoramik suliaasa siulliit ilagaat sanasunik suliaqartitsinermut atatillugu aningaasartuutit akileraarutitigut ilanngaateqarsinnaatitaannerup atuutsilerseqqinnissaa.

Sanasunik suliaqartitsinermut atatillugu aningaasartuutit akileraarutitigut ilanngaateqarsinnaatitaanerup pitsaaqutai ajoqutaalu danskit naalakkersuisuinit ukiuni arlalinngulersuni eqqartorneqartarsimapput.

Sanasunik suliaqartitsinermut atatillugu aningaasartuutit akileraarutitigut ilanngaateqarsinnaatitaanerup eqquteqqinnissaanut tunngavilersuutigineqarneruvoq sanaartornermi suliaasaqarnerulernissaaq, taamaasillunilu suliaasaqarfimmi tassani suliaasaqartitsiuarnissaaq. Tamatuma saniatigut inuit angerlarsimaffimmini sanasunik suliaqartitsisarnerminni isertorlunilusoq sulisitsisarnatik inatsisit naapertorlugit sulisitsisalernissaanik aqqissuussineq kajumissisuseqartitseqataalissaaq.

Sanasunik suliaqartitsinermut atatillugu aningaasartuutit akileraarutitigut ilanngaateqarsinnaatitaanermik danskit akerliusuisa ilaatigut oqaatigaat tunngavilersuutigaat sanasunik suliaqartitsinermut atatillugu aningaasartuutit akileraarutitigut ilanngaateqarsinnaatitaaneq piffissami ajornartoorfiusumi atorneqarsinnaasoq. Aningaasarsiornerulli siuariartornerata nalaanni suliaasaqarfimmik aalajangersimasumik salliutitsilluni suliaasaqartitsiniarneq suliffissaqartitsiniarnerlu tapersersussallugit inuiaqatigiit aningaasaqarnerat eqqarsaatigalugu isumatusaarnerunngilaq. Sanaartornerup iluani

sanaartorluartoqareertillugu sanasunik suliaqartitsinermut atatillugu aningaasartuutunik akileraarutitigut ilanngaateqarsinnaatitaalernissamik kajumilersitsiniarneq inuussutissarsiummi tassani assersuutigalugu aningaasarsianik pissusissamisuumngitsumik qaffassaaqataasinnaavoq sulisussanilluunniit nunanit allaneersunik tikisitsisarnerulernissamik kinguneqarsinnaalluni.

Nunatsinni najukkani assigiinngitsuni inissiat nammineq pigisat innaallagissamik atuinikinnerulernissaq eqqarsaatigalugu aserfallatsaaliortariaqartut amerlanerarneqarnerat Naalakkersuisut isumaqatigaat. Massakkulli aningaasarsiorneq pitsanngoriartormat illoqarfiillu ilaanni sanaartorneq ingerlanneqangaatsiareermat sanasunik suliaqartitsinermut atatillugu aningaasartuutunik akileraarutitigut ilanngaateqarsinnaatitaanerup eqqunneqarnissaa naleqquttuunersoq isumaliutigilluaqqissaartariaqarpoq.

Sanasunik suliaqartitsinermut atatillugu aningaasartuutunik akileraarutitigut ilanngaateqarsinnaatitaanermik eqquassinissaq siunertaralugu aningaasarsianit akileraarutit pillugit inatsisip allanngortinneqarnissaanut siunnersuummik saqqummiussinissaq, inatsisiliormi sulinermut kiisalu tusarniaanermi tunniussereerfissaatitaasut, feriarfiup nalaani sunnerneqarnissaat eqqarsaatigissagaanni, Inatsiartullu tunniussinissamut killissarititaat pillugit, siunnersuutip UPA2017-imi saqqummiunneqarnissaa angumerineqarsinnaassanngilaq.

Taamaattorli Naalakkersuisut tamatuma saniatigut isumaqarput inunnut ataasiakkaanut inuussutissarsiuteqartunullu akileraarsitseriaatsit sinaakkutaat pitsanngoraaffiginiarlugit sulinermi siunnersuutigineqartoq ilanngunneqartariaqartoq, siunnersuutigineqartormi piffissami ajornartoorfiusumi imaasinnaammat sakkutut atorneqarsinnaasoq.

Kiisalu oqaatigissavara, akileraartarnermut inatsimmi nalinginnaasumik ilanngaasiinissamik eqquassinermi periarfissaaneq ajormat aningaasat sinaakkutit aalajangersimasut iluanni taamaallaat ilanngaatinik killiliinissaq. Allatut oqaatigalugu ilanngaatit atuunneri katillugit 3 mio. kr.-nut killilerneqarsinnaanngillat. Inuk kinaluunniit, ilanngaateqarsinnaanermut piumasaqaatinik naammassinnittoq, ilanngaateqarsinnaataassaaq, taamaattumik Naalakkersuisut isumaqarput, suliaqarfimmi inatsisitigut suliniuteqalinnginnermi, misissueqqissaartoqarnissaanik pisariaqartitsisoqartoq. Misissuinerneq taamaattuni ilaatigut nalilerneqassaaq, ilanngaat taamaattoq qanoq annertutigissanersoq, siunnersuuteqartup sunniut pitsaasoq taasaa anguniarlugu taamalu ilanngaatip taamaattup aningaasaqarnikkut kingunerisassai qanimut misissorluarneqassallutik. Taamatullu isumaliutigineqassaaq, ilanngaatip taamaattup akileraarnermut ingerlatsivimmi qanoq piviusunngortinneqarsinnaanersoq, ilanngaammimmi atuiniarnermi uppersaatitigut piumasaqaateqartoqassammat. Taamalu siunnersuutip isumaginninnikkut isikkua isumaliutersuutigineqassaaq.

Taamatut oqaaseqarlunga Naalakkersuisut allannguutissatut siunnersuut saqqummiutissavaat:

Akileraartarfimmi suliniutinut allanut atatillugu nammineq inigisap aserfallatsaalineqarneranut imaluunniit nukimmik siparnerunissamut sanasunik suliaqartitsinermut atatillugu

anigaasartuutit akileraarutitigut ilanngaatigineqarsinnaalernissaanik eqqussinissamut periarfissat misissuinissamut Naalakkersuisut peqquneqassasut Inatsisartut aalajangiiffigisassaattut siunnersuut.

Naalakkersuisut allannguutissat siunnersuutaat Inatsisartuni tapersorsorneqarpat, sanasunik suliaqartitsinermut atatillugu anigaasartuutinik akileraarutitigut ilanngaateqarsinnaatitaanerup eqqunneqarnissaanut periarfissat pillugit nassuiaammik annikinnerusumik oqaaseqaammik Naalakkersuisut suliaqassapput, taannalu kingusinnerpaamik UPA17-imi Anigaasaqarnermut Akileraartarnermullu Ataatsimiititaliamut nassiullugu.